

Beste prätjesmakers,
Hierbi-j, an 't begin van alweer 'n heel ni-j seizoen, ons derde mini-krantje met laesvoer. Zol mooi zun as de leden die weinig van zich laoten heuren now ok 's pen en

papier zollen griepen, of desnoods de computer, um te melden wat zi-j allemaol veur spannends hebben metgemaak.
Verzinnen of gewoon grof liegen mag ok.
Töt de derde dinsdag, veurzitter Jan

Agenda bi-jeenkoms op dinsdag 20 september 2022 - 14 uur!

- Aopening
- Opmerkingen veslag van de veurege vergadering (pag. 2-3)
- Wat is ter allemaol gebeurd de letste maonden. Iedereen kump an de beurt um zien zegje te doen.
- Waeges succes geprolongeed: estafette-vehaaltjes, maor now met 'n sprookje as uitgangspunt!
- Lief-en-leed-pot
- Wat wiejers nog an de orde kump
- Rondvraag - Sluting

Joop is niet te stoppen

Jan Verheijen

Goed ni-js: Joop is druk bezig met alweer 'n ni-j boek.

Af en toe maak ik doorveur kötte fiets-tochjes van Gaanderen naor Dru-laan 43, want der mot wel een en ander aoverlegd wodden. Bi-j een van die keren had Joop zin eerste boek op taofel liggen, dat ik wel kende van naam, maor woor ik nog nooit in had gekekken: 'Zo plat as een cent.'
Het buukske is van 2000, dus nog van veur de oprichting van onze werkgroep d'Eigenspraak. De WALD-spelling was ok nog niet zo ingeburgerd en tegeswoordig zollen wi-j deurum af en toe de wenkbrauwen optrekken onder 't laezen.

Maor de inhold is een juweeltje, net as het andere werk van Joop, en dus begon ik met 't digitaliseren van het uutverkochte buukske dat zo'n kleine 100 pagina's telde. Doornao he'k een en ander an de WALD-spellingangepas in aoverleg met Joop.

Van 't een kwam 't ander. De schriever kwam op 't een idee um dit, as digitaal adegheidje bedoelde buukske, van ni-jen te laoten drukken. Zo kan 't dus zo maor gebeuren dat ter met Sinterklaos en Kessemis twee boeken van Joop in de winkel liggen. Een boek en een buukske. Hieraover meer op [pagina 14](#).

Veslag bi-jeenkoms donderdag 16 juni 2022

Joop Keurentjes

Aanwezig waren:

Thea Broekhuizen, Maaike Arts, Riet van Loosen, Mieke Kock, Joop Keurentjes, Jan Geerts, Jan Verheijen,

Afwezig waren: Helga Wesseling, Mientjen Schweckhorst, Diny ten Brink, Liesbeth Bolk, Melanie Roseboom, Ben Rouwhorst, Jan Mulder en Ton Hettema.

1. Aopening deur de veurzitter

Jan kwam ruim een half uur te laat omdat e 'n lekke band had en heit de aanwezige leden van hatte welkom. De opkomst is an de schraole kant. Um haopelek moverende redenen is een groot antal leden niet aanwezig. Haopelek können wi-j ze bi-j de volgende bi-jeenkoms in september weer van hatte welkom heiten.

2. Umdat Diny met vakantie is zörgt Joop veur de notulering.

Ben Rouwhorst is waeges ziekte afwezig. Wi-j wensen Ben van hatte een snelle baeter-schap en haopen dat e d'r de volgende bi-jeenkoms – zoas altied – weer bi-j is. Melanie had 'n onverwacht ingelaste leerlingenbespraeking en deurum mos zi-j verstek laoten gaon. Töt heur grote spiet, zoas ze an de veurzitter meldde.

3. De veurege vegadering is afgespraoken dat wi-j in 't vevolg u 14.00 uur beginnen, van-waeghe ons enege werkende lid Melanie Rozeboom. Mieke Kock stelt zich veur. Zi-j nimp de honneurs waar namens 't bestuur van OVGG. Mieke kump van oorsprong uut Raofelder. Ons dialek is heur met de paplaepel ingegeven en zi-j is 'n mooie aanvulling op ons gezelschap.

4. De lief-en-leed-pot

Umdat Ben afwezig is, können wi-j ons uut de mond gespoorde tientje an 'm niet kwiet en deurum schoeven wi-j dat op töt de volgende keer op 20 september.

5. Vraogenlies 128

In verschillende oudere woordenboeken kommen uitdrukkingen of weurd veur die niet of nauweleks meer bekend zun. Disse vraogenliest het der een antal. Ok a'j zo'n uitdruk-king of woord niet kent, is dat weerdevol, want dooruut kan geconcludeerd wodden dat de uitdrukking of dat woord in onbruuk is geraak. Het is de bedoeling dat iedereen zelf die liesten ingevuld trugstuurt naor 't ECAL

6. Het schrieverspad

Dit pad is een laan met inmiddels 68 individuele en verschillende, inlandse bomen op Landgoed Kotmans in Miste. De bomen zun door geplant deur mensen die doortoe ge-nomineerd zun waegens hun viediensten veur promotie en behold van de streektaal. Bi-j elke boom steet een bodjen met een persoonleke tekst van de planter. Met de joren gruujt 't schrieverspad uut tot een interessant cultureel en ecologisch monument in een prachtig stuk natuur. De Stichting Schrieverspad is opgericht op 2 augustus 2018 en het as doelstelling de financiële ondersteuning, promotie en instandholding van de streek-taal van Achterhoek en Liemers.

7. Wat wiejers nog an de orde kwam

Bionisch laezen: Met behulp van bionisch laezen können mensen baeter en doeltreffen-der laezen. Dit systeem is ontwikkeld veur kinderen en volwassenen met laesproblemen. Het blik dat bionisch laezen hun laessnelheid verbaetert. Het idee is dat ow ogen ge-richt zun op 't vetgedrukte deel van 't woord en ow herses de rest afmaken. Ow herses können sneller opnemmen dan ow ogen könt laezen. Deur 't antal letters te verminderen dat 't oog neudig het um naor te kieken, köj sneller laezen met behold van de volledige context. In feite vilt der ok niks van de oorspronkelijke teks weg.

Meer hieraover op <https://10015.io/tools/bionic-reading-converter>

Plek door maor's 'n stukske teks in en i-j krieg dan van eiges 'n resultaat dat völ sneller te laezen is.

8. Rondvraag – sluting

Joop vrug um in 't vervolg 't verslag en de agenda as document naor alle leden te mai-len. Het kan dan aevengoed ok nog in ons Mini Maondblaedje geplaatst wodden.

Maor wie alleen de agenda of iets anders uut wil printen kan baeter de pagina-versie van ons minikrantje downloaden! De spread-versie gif altied twee pagina's naos mekaar en dat is moeilek af te drukken.



Spread-versie



Pagina-versie

Umdat ter wiejers niks meer an de orde kwam, kon de veurzitter de bi-jeenkoms sluten.

De volgende bi-jeenkoms is:

Dinsdag **20 september 2022**.

Aanvang **14.00** uur.

Locatie: het Kaetelhuus – DRU-locatie.

Goed gaon, Joop.

Schoolrapport

Melanie Roseboom

Wa'k zo biezunder vin an dén school woor ik werk, is hoe vri-j en zelfstandig de blagen bun. Dat onze school anders is as andere scholen, zo wödt völle gezegd, maor wat leveren wi-j geweldige, sociale, biezondere en creatieve blagen af. Kinder die ummekieken naor mekaar en willen leren. Letste jaar was ik de mentor van groep 7, de vroggere vijfde klas, en och wat heb ik genoten!

Twee keer in 't jaar krieggen ze hun rapport. Een rapport woor wi-j meschien wel twee uur per kind druk met zun. Een persoonlek rapport met völle tekst aover 't kind zelf, zonder bolletjes of cijfers. Dat wödt enorm gewaardeerd deur de olders en de kinder. Nao 't uutdelen kwammen der twee naor mien toe. Dat bun toch van die schatten! Letst hadden zi-j een contract bi-j zich. Deur dat te ondertekenen, zol 't betekenen dat ik de blagen moes adopteren, as de olders d'r kloor met wazzen.

Maor de letste schoolwaek kwammen zi-j met z'n beien naor mien toe. Zi-j wollen ook een rapport schrijven, maor dan aover mien. Hoe ik 't afgelaopen jaar bun gewest. De letste schooldag heb ik mien rapport gekregen met een handtekening van beie heren.

In't rapport stonden complimenten, maor ook verbaeterpunten. Zo stond d'r bi-j taal en spelling: *"We zien dat je super goed je best probeert te doen, maar dat je Nederlands nog erg lastig vindt. Dat blijft dus een mooi aandachtspunt voor komend jaar. Je haalt regelmatig het Achterhoeks met het Nederlands door elkaar. Komend jaar gaan we je daarbij helpen. Dan kump 't vanzelf goed, juf."*



Bontebrugschool

Zonder Poetin

Joop Keurentjes, Ettens dialek



Tied zat, zei de olde boer
En draejen zich weer um in bed
Van buten klonk 't straotrumoer
De wekker wed stillekes uitgezet

Wi-j rennen ons te pletter
Elke dag van hot naor heer
Van laptop naor koffiezetter
Hen en weer, wel twintig keer

Tied zat um de trein te halen
Haost ow niet, dat gif ongemak
Haostige spoed zal altied falen
Denk an het tempo van een slak

Altied dat jakkeren en drijven
Um toch maor op tied te zun
Kan der een boek van schrijven
Aover tied die'j ow zelf niet gun

Wetten dat de wereld niet vergeet
A'j efkes zo lui bunt as de neten
Zie den olde boer, hoe dén dat deed
Met een grenzeloos gerust geweten

Niks is der mooier dan dat
Niet denken an de dag van morgen
Jao, zo'n lummeldag het wel wat
Zo'n dag met niks, zonder zorgen

Zo'n dag met tied in aovervloed
Woor gin end an liek te komen
Zo'n dag zonder haostige spoed
Woo'j alleen maor van könt dromen

Te zitten onder een ruisend bladerdak
Zonder zörg en poespas, met völ plezier
Zonder ene Poetin en ander ongemak
In de schaduw met een goed glas bier

Synoniemen


Joop Keurentjes

Wat mien aan onze taal opvilt is dat wi-j veur de meeste zelfstandige naamwoorden en ook veur werkwoorden heel völ synoniemen hemmen. Een synoniem is een ander woord veur 't gebezigde woord. Veural bi-j het dialek zoas dat gespraoken wödt langs de oevers van de Olde lessel; zeg maor van Dörkem töt en met Gendringen, zien wi-j een enorme varieteit in het benoemen van werkwoorden en dingen. Dat is hatstikken mooi veur mensen die völ schrieven. I-j heb een enorme bron woo'j uut putten kön en dat gif alleen maor meer kleur an 't vemaal. Hieronder za'k in een antal citaten proberen dat te vedudeleken. Het zal wel ietwat aoverdreven aoverkommen, maor 't doel heilgt de middelen, zö'w maor zeggen.

Meister Kees was met zien klasje – groep vijf van basis-school 'De Klimpaol'- bezig met een lesjen Nederlands. Op enig moment vrug e an de klas wat of 'drentelen' betekent. Der gaon een hoop vingers umhoog. Jantjen mag 't zeggen: "Da's lopen meester". "Goed zo", zegt de meester, "da's langzaam lopen, Wie wet der nog een ander woord veur lopen?" vervolgt de meester dan. Der kommen vanuut 't leergierige klasjen nog een antal namen veurb-j, zoas; stiepelen, stiefelen, stappen, gaon, wandelen, slenteren, draven, sloffen, schungelen en köttelen.

Dan vrug de meester ok nog um een zin te maken met 'gaon' derin. Tinneke, een lief

schrandere wichjen op de veurste bank is 't eerste kloor. En, zegt de meester wat he'j dervan gemaak Tinneke? "Veur da'k 's marges op school bun mo'k nog 'n heel end gaon", zegt ze trots. "Goed zo Tinneke want jij komt altijd lopend op school, toch?" vult de meester nog aan. En zo had 't klasjen van meester Kees toch maor mooi 10 (tien) synoniemen gevonden veur 't woord lopen! Der kwam nog 'n hele rits andere woorden met een handvol synoniemen langs uut 't klasjen van meester Kees. Jao, het was een héél, héél pienter klasjen. Allemaol aspirant V.W.O-ertjes, volges de olders dan en die können 't wetten. Meister Kees had 't allemaol zovöl meugelek genoteerd en opgeschreven. Erg handig veur de eerskommende olderaovend.



Tekening uut 'n olde Kattelieke Illustratie ± 1930

Hieronder een klein aoverzichtje van de bi-jvangs van meester Kees.

Eten: smullen – smakken – kèwwen – vraeten – slurpen – sloeken – slikken.

Onweer: zwoor weer – donderbuj – schoer – knetterbuj.

Kip: tuut – hoen – hen – henne – kiep – waterkont.

Jong varken: keu – pog – big – poetjen.

Wagen: kar – koets – sjees – karos – diligence – krujwagen.

Lachen: grinniken – grijnzen – gieren – schateren – giechelen – gniffelen – bulderen.

Huis: woning – keet – onderkommen – onderdak – honk – behuizing.

Harmonika: trekzak – boekörgel – pensörgel.

Stelen: jatten – gappen – achteraoverdruken – lenen en nooit trugbrengen.

Meister Kees was dik tevræjen want hi-j had weer een heleboel geheurd veur de olderaovend. Altied makkelek a'j wat achter de hand heb.



KLIK



KLIK

Kleine gedichjes

Maaïke Arts

WI-J WOLT WARME WOLLEN WINTERWANTEN.
WI-J WOLT KLIEDER KLADDER KLODDER KLADDER KLOETEN.
WI-J WOLT SAPPIGE SOPPIGE ZANDKUUKSKES.
WI-J WOLT 'N BRUUN BÖKSKE MET BRUNE BRETELS.
EN GIN KRIEBELENDE KRABBENDE COLTRUI.
MAOR WEL WEER EEN ULFSE ULKE BOLLEKE KNUL
MET GIN IKKE PIKKEND SNÖRRETJE MAOR WEL
MET 'N UUTJE, TUUTJE VARKENSSNUUTJE, UUTJE TUUTJE WEG!

WERKLUJ
I-J ZIET MEKAAR JAO IEDERE DAG.
DEN ENE WERKT OW TEGEN, DEN ANDERE MET 'N LACH.
DEN ENE IS OW MAOT, DEN ANDERE KRIG OW OP DE KAS.
MAOR EEN DING IS JAO WOOR.
I-J ZIT HAOS AN MEKARE VAS
EN 'T WARK MOT KLOOR.
I-J GAOT EN MOT JAO NAOR DE HUT.
BEGRIEP MEKAAR EN DRINK 'N BEKSKE KOFFIE MET ONDERIN WAT PRUT.
ZEG GOEIE MARGEN EN AJUUS.
DAN PAK I-J OW 'T IEZEREN PEERD
EN TRAP 'M AN NAOR HUUS.

ONDER DE NEUS GEZAK
BUN IK WAT NAOR BENEJEN GEGLEJEN
MET DE ROOIE ZADDOEK NOG IN DE KONTEZAK.
GLI-J IK WIEJER, SLOOM EN MET VÖL GEMAK.
MAOR DOOR KUMP KEESJES ARM AL NAOR MIEN TOE.
ZWOOR VEKELD EN SNOTTEREG, POEH, POEH!
EN NOW ZIT IK AS SNOTTEBELLEKE VASGESPELD
OP ZIEN MOUW AS GRÜNE BI-J 'T GAELE STELLETJE.
'VAEG OP TIED OW NEUS' ZEI ZIEN MOE.
VEUR KEESJE IS DAT VÖLS TE VÖL GEDOE!

LACH NÍET MAOR SCHATER
GAO NÍET OP TIED MAOR KOM WAT LATER.
LUUSTER NAOR DEN GELEUVEGE THOMAS EN NIET NAOR DE PATER.
PRAOT WEL EN HOL NÍET OW SNATER.
DRINK 'N BORRELTJE EN GIN GLAESKE DREUG WATER.
PIS NÍET IN EEN STRÄÖLTJE MAOR KLATER.
KLOP NÍET OP DE STALDEUR MAOR BATER.
MAOR NEM OW WEL EEN POESJE EN GIN KATER.

'T HELDERE SCHOON WASVRÖWKE.
ZI-J BEGINT EN WRINGT.
ZI-J WRINGT EN ZINGT
EEN MOOI DEUNTJE
OP EEN HELDER TEUNTJE.
ZI-J WRINGT, 'T ZINGT EN 'T KLINKT.
'T KLINKT TÖT HEUR WAS MOOI BLINKT
EN DE VIEZE MODDEREGE DRAB TÖT OP DE BAOJEM ZINKT.
ZI-J ZINGT EN WRINGT.
'T WASVRÖWKE GLIMT EN BEMINT
HEUR SCHONE WAS AS 'N KLEIN KIND.



Beumkes kieken

Jan Verheijen

Precies één dag veur 't kabinet in 2020 de grote lockdown afkundedge, hadden wi-j nog net een bi-jeenkoms van 't Ecal bi-j de Krint in Hummelo. Dianne Abbink miek toen bekend dat ter 'n speciale metwarkersboom gepaot zol wodden in 't Schrieversbos op landgoed Kotmans, Kotmansweg in Miste bi-j Winterswiek.

Op 20 augustus van dit jaar was 't dan eindelek zowied dat belangstellenden 'onze' boom mochten bewonderen. Ik had 'n uutneudeging gekregen en umdat 't weer metwarkte, he'k de barre tocht met de fiets afgeleg, zodat ik mien zowat twee uur later in 't illustere gezelschap bevond van een groepke 'metwarkers', woorvan sommegen al decennia de invulliest trouw veurzien van woorden en uitdrukkingen die gebezigd wodden in hun dörp of stad.



't Was 'n hele mooie fietstoch, want ik volgde niet de gewone weg via Aalten richting Winterswiek, maor gong nao Vasseveld binnendeur. Zoas altied he'k dan völ oog veur wa'k onderweg tegenkom. Bi-j Vasseveld zag ik bevobbeld dit biezondere vekeersbod (linksonder) en toen kon mien dag niet meer kapot.

He'j ooit geheurd van de buurtschap 'Dale' (KLIK)? Now ik ok niet, maor dat lig zo'n bietje tussen Aalten en Bredevoort, of Bredford City zoas ze dat bi-j ons vrogger nuumden.



Laot door now net toevalleg de koning en de könnegin op bezuuk zun! 't Kon gewoon niet op. Ik geliek mien tillefoontje uut tes gehaald en 't paar hoorfien vasgeleg. Ik was te laat veur 't optreden van de harmonie en umdat ze 'n afwachtede holding annammen, bleef ik nog 'n hötje staon



Oranjefeest in Dale

kieken um te heuren of ze nog wat moois in petto hadden, maor uiteindelek he'k mien maor weer op de fiets gezet en bun'k wiejergeknaejd. In die streek geet 't trouwes bult op en bult af en ok dat was weer iets verrassends. Now zu'j denken Jan is bli-j met niks, en dat he'j dan helemaal goed.

Het doel van de fietstoch van vandaag was dus 't Schrieverspad woor de namen van beruumde Achterhoekse en Liemerse schrievers zun vereeuwigd deur 't paoten van 'n echte boom. Compleet met bodje woorop de naam van de gelauwerden. Naos Dianne Abbink (links op de foto hieronder) was ter nog 'n spraeker, maor wat ter gezeg wed he'k niet metgekregen. Dat lig niet

alleen dooran dat ze door heel anders praoeten as bi-j ons – zo zeggen ze Achterhook en **good** gaon – maor ik heb 'n paar waeken las gehad van bi-jnao totale doofheid. Dat is a'j dit laes haopelek helemaal aover.

Onze metwarkersboom is 'n hele speciale, 'n scharlaken eik. Toen ik der veurston, was e gruun, maor dat wödt, as 't goed is, in de herfs helemaal anders. 't Park is met 68 bomen now helemaal kloor, dus 'n Joop Keurentjes eik, es of beuk zit ter jammergenog niet meer in. Door motten wi-j eiges wat op bedenken.

Doornao verplaatste 't gezelschap zich naor café Den Tappen woor 'n optreden plaatsvond van 'Goed Volk' met onder anderen Frans van



Gorkum, i-j wet wel, van dat schitterende boek!
Der zol ok nog 'n verrassing zun, maor dén
he'k niet afgewach, want 't wed mien te laat
en ik mos nog trugfietsen naar Gaanderen.

Op 'n gegeven moment nam Bennie Joling dén
as gast in de zaal zat ok nog efkes de gitaar
in de hand en vól Achterhoekers bun door fan
van. De olde rocker, net as mien viefenzeuven-
tig joor, proberen nog wat snelle loopjes op
de geleende gitaar, maor dat gong 'm dudelek
minder goed af as vrogger. Gelukkig redde de
bassist van 'Goed Volk' 'm af en toe deur 'n
extra maat in te lassen. Ik von 't toen wel wel-
letjes en via de bar kon ik via de achter-
uitgang mooi onopvallend wegkommen.

Op de volgende pagina nog wat foto's van
bodjes bi-j de bomen met doorop klinkende
namen. A'j ow (klein)kinder wil laoten zien da'j
hatstikke beruumd bun as 'metwarker', mo'j
dus naar Landgoed Kotmans in Miste!



Olde rocker Bennie



'Goed Volk' in actie



De metwarkers van 't WALD - scharlaken eik -

As letste boom, epot in 't Schrieverspad,
Betuug ok ik de leefde veur ons eigen plat.
En dan derbie: ik eer' de leu uut Liemers en de Achterhook
Veur 't warken an ons WALD, dat mooie woordenboek.
dialect Borklo



Lex Schaars - liriodendron tulipifera (tulpenboom)

Mien soort kump in ons land van olds neet veur,
Maor zeg toch neet, da'k hier doorum' neet heur'.
Ik zal mien beste doon, geef mie 'n rume kans,
Zoda'k 'n sierraod word in 't WALD
van landgoed Kotmans.

Ni-j boek van Joop!

Jan Verheijen



Joop het al zien verhalen van de letste twee jaar, plus nog 'n stel ni-je, bi-j meka gezet in 'Tied zat'. Geleuf maor dat ze der veur in de ri-j staan! Kump uut in 't naojaar en tegen de sinterklaostied is 't te koop bi-j Joop en baovengetekende, maor natuurlek ok bi-j De Welkoop in Sillevold en bi-j Koenders in Gaanderen. En weer geet de volledige opbrengs naor 'n goed doel.
Ok dit keer hollen wi-j de oplage klein, zo'n tweehonderd stuks en de pries zal weer ongeveer 12,50 € bedragen.

De oplage van de herdruk van "Plat as een cent" wödt wat kleiner. Disse eerste dichbundel van Joop is 90 pagina's dik en geet ongeveer 10 € kosten.



Zowat mo'j niet doen bi-j Poetin, want door kump naregheid van!



Mafkees (KLIK)



Echte Lakenvelders bi-j Gaanderen

Tutu

Jan Verheijen

Soms grip 'n verhaal of foto ow zo an dat 't niet uitmikt of 't um old of ni-j ni-js geet. De foto op disse pagina lut 'n vader zien d n al in april is aoverleden maor d n v l mensen geraakt het.

't Geet um Evert Muis (37) uut Alphen en hi-j kreg a'j dit laes al ruum 'n joor geleien te heuren dat hi-j uitgezaejde melanoomkanker had. De foto woor hi-j op steet met zien dochttertje Logan wed gezien deur miljoenen mensen en messchien he'j 'm ok al onder ogen gehad.

Hi-j liet de foto maken umdat hi-j een herinnering achter wol laoten veur zien kinder, woorvan die zollen zeggen: 'mien papa had schijt an alles.' Deurum had e 'n tutu-r ks-

ken angetrokken. Hi-j had gin probleem met doodgaon, maor wel um zien nog kleine kinder achter te laoten en is 't niet precies dat woor de meeste mensen bang veur zun?

Toen hi-j nog midden in de strijd ston tegen de uitgezaejde melanoomkanker kwam zien grootste wens uut: 't Oprichten van 'n stichting die 't meugelek mik um gezinnen met 'n terminale older onvegaeleke laatste herinneringen te bez rgen

En de droom kwam uut: sins 1 februari 2022 is Stichting TuTu officieel 'n feit. Kiek maor's op [tututule](#) (KLIK)



De taal levert mi-j 'n streek


Hans Mellendijk; spelling volges meister G.A. van der Lugt

Hans Mellendijk, de huusdichter van ons veurma-lige blad op d'eigenspraak.nl het een hele mooie dichbundel gemaak met de titel d n hierbaoven steet. 't Boek is uitgegeven bi-j de bekende uitge-veri-j Fagus en is ok door te [bestellen \(KLIK\)](#).

De dichbundel van 16 x 32 cm, is 132 pa-gina's dik en uitgevoerd in softcover.

De pries is € 20,- zonder verzendkosten

Hieronder een van de gedichten uut disse, ech schitterende bundel.



Achterhoek

Vanaf de diek ligt 't daor orderlek bi-j.
't landschap l t zich gemakkelijk laezen.
Hoogspanningsdraode verraod 't kanaal.

Af'edaald tussen de coulissen brekt
de ma s de blik op de huuskamers af.
Dicht'egreu'jd de zichtlienen naor de weerld.

Pas nao 't hakselende geraos van de
bekken; oplaezen, trekken, snieden, kneuzen
pletten, blaozen is d'r weer schitterend lech.

Dan nog effen 't denderen van de cross
motoren aover 't leuge stoppelveld.

Jao, laot n w de novemberstorm maor kommen.